

Namo tassa bhagavato arahato sammāsambuddhassa

Pajjamadhu

Ānanda rañña ratanādi mahā yatinda,
Niccappabuddha padumappiya sevinaṅgī;
Buddhappiyena ghana buddha guṇappiyena,
Therālinā racita pajjamadhuṃ pibantu.

1. Uṇṇāpapuṇṇasasimaṇḍalato galitvā,
Pādambujaṅguli dalaṭṭha sudhā lavānaṃ;
Pantīva satthu nakhapanti pajāvisesaṃ,
Pīṇetu suddha sukhitammaṇa tuṇḍapītā.
2. Khittāya mārariṇā parivatya satthu,
Pādassayā jita disāya sitattalāya;
Yā jeta kañcana sarāvaliyā siriṃ sā,
Detanginaṃ raṇajayaṅgulipantikantā.
3. Sovaṇṇa vaṇṇa sukhumacchavi somma kumma,
Piṭṭhīva piṭṭhi kamatunnati bhāti yesaṃ;
Tesuppatiṭṭhitasukomaladīghapaṇhi,
Pādā jinassa padadantu padaṃ janassa.
4. Acchera paṅkajasiraṃ siriyā sakāya,
Ye maddino viya caranti saroja sīse;
Sañcumbitā viya ca tāni parāga rāgā,
Te nīrajā munipadā padadantu lakkhiṃ.
5. Agāmi kāla jana maṅgala bhattu bhāvaṃ,
Vyākattumatra kusaleniva nimmitāni;
Yātrāsumatṭhasatamaṅgalakkhaṇāni,
Sādhetu naṃ padayugaṃ jayamaṅgalāni.
6. Sassevijantuvarasantipurappavese,
Niccaṃ susajja ṭhapitāniva maṅgalāya;
Ye te dadhanti kalamaṅgalalakkhaṇāni,
Vattantu te jinapadā jayamaṅgalāya.
7. Sabbebhībhūya sapadesu nipātanassa,
Saññāṇakaṃ viya yadassitasabbaloko;
Pādātyadhokatatilokasirovarā pi,
Lokaṃ puṇantu jayamaṅgalakāraṇāni.
8. Lokattayekasaraṇattavibhāvanāya,
Sajjo va tiṭṭhati yaḥiṃ suvibhataloko;
Taṃ sabbalokapaṭibimbitadappaṇābhaṃ,
Pādadvayaṃ janasusajjanahetu hotu.
9. Lokuttarāya siriyādhigamāya suṭṭhu,
Rajanti yattha diguṇāniva pātu bhūtā;
Cakkāsanābhisahanemisahassarāni,
Tyaṅghī disantu sakalissariyaṃ janassa.
10. Yatrullasanti duvidhāniva pātū bhūtā,

Dhammassasabbabhuvanassa ca issaratte;
Cakkāni cakkasadisāni sudassanassa,
Tānāja jantu saraṇā caraṇāni hontu.

11. Sattesu vacchatu sirī sirivacchakena,
Sovatthi sotthimanutiṭṭhatu puggalesu;
Nandiṃ janānamanuvattatu nandivattī,
Sīsānalaṃkurutu pādavataṃsako pi.
12. Bhaddāya pīṭhamupagacchatu bhaddapīṭhaṃ,
Vuddhiṃ janānamanuvattatu vaddhamānaṃ;
Puṇṇattamaṅgimanukubbatu puṇṇakumbho,
Pāti ca pātu satataṃ janataṃ apāyā.
13. Setāpattamapanetamaghātape taṃ,
Khaggo vichindatu sadā duritārivagge;
Saṃklesadāhamapanetu satālavanta,
Saṃvījanī kumatimakkhikamorahatto.
14. Ākaḍḍhano janavilocanamattaninnaṃ,
Vāretu sabbagativāranamaṅkuso so;
Pādambujassirivilāsaniketanaṃ va,
Pāsādalakhaṇamupetu manopasādaṃ.
15. Pāṇīnamattabhajataṃ varapuṇṇapattaṃ,
Sammā dadātu padanissitapuṇṇapatto;
Pādesu jantu manabandhanadāmabhūtaṃ,
Dāmaṃ dametu vimalaṃ janatammanāni.
16. Uṇhīsakuppalamaṇīpadumehi pādā,
Sassevijantukaraṇāni vibhūsayantu;
Sannettanāvupagatānamanagghakāni,
Bojjhaṅgasattaratanāni dade samuddo.
17. Uttuṅga niccalaguṇā jitatāya niccaṃ,
Sevīva pādasiri nicca samubbahaṃ va;
Atrāpi sakkabhavanubbahaṇe niyutto,
Pādaṭṭhameru bhavataṃ bhavataṃ vibhūtyā.
18. So cakkavālasikharī pyavataṃ samantā,
Sabbūpasaggavisarājanataṃ samaggaṃ;
Dīpā puthūpi caturo dvisahassa khuddā,
Dhārentvapāyapatamānamadatva jantaṃ.
19. Sūro pabodhayatu jantu saroruhāni,
Cando pasāda kumudāni manodaheesu;
Nakkhattajātamakhilaṃ subhatāya hotu,
Cakkaṃ dhajaṃ ripujayāya jayaddhajāya.
20. Jetuṃ sasamaṃsada-sudassana-cakkavatti,
Cakkānugantalalitaṃ yahimāvaheyya;
Cakkāṇuvatti parisāvata-cakkavatti,
Naṃvattataṃ padayugaṃ janatā hitāya.
21. Pujetumāgata vatā vajirāsanaṭṭha,

- Mindena chaḍḍita mahāvijayuttarākhyam;
Saṃkham pavitṭhamiva mārabhayā padādho,
Pādaṭṭhasaṃkhamiha vattatu santiyā vo.
22. Sovaṇṇamacchayugalaṃ sivabhatta bhoge,
Icchā bahūpakaraṇaṃ bhavataṃ janānaṃ;
Kumbhīladhiggahitato va padutthacittā,
Pādambujākara vigāhi tu nopahontu.
23. Sattāpagā janamanoja male jahantu,
Saṃklesadāhamapanentu dahā ca satta;
Selā ca satta vidadhantu janassa tānaṃ,
Lokappasiddhijanane bhavataṃ patākā.
24. Pāṭaṅki santi gamane bhavatūpakārā,
Dāhettanesu jahataṃ padacāmaraṃ taṃ;
Sallokalocanamahussava-ussitaṃ va,
Vatteyya toraṇamanuttaramaṅgalāya.
25. Yasmiṃ miginda gata bhīti balāva daḍḍha,
Dānā natā siravidāraṇa pīlitāva;
Nālāgirī karivaro girimekhalo ca,
Taṃ sīhavikkamapadaṃ hanatā ghadantiṃ.
26. Pāpāhino hanatu pādasuvaṇṇarājā,
Vyagghādhipo kalijane adataṃ asesam;
Vālāha-assapati sampatitum adativā,
Pāyesu pāpayatu santipurampajāyo.
27. Chaddanta danti lalitaṃ galitaṃ rusamhā,
Luddetta dubbhini dise acalaṃ dadhāno;
Pādaṭṭhahatthipati sampati jantutāse,
Tāsetu hāsamaparandisataṃ satānaṃ.
28. Sabbaṅgino caraṇuposatha hatthirājā,
Pāpetu sabbacatudīpikarajjalakkhiṃ;
Kittīva pādapariḥārikatā niyuttā,
Kelaselapaṭimā hitamācareyya.
29. Sāmissa haṃsasamaye dahapāsabaddha,
Māsīna vesagamako viya pādahaṃso;
Nigghosa gantijitato viya mūgapakkho,
Yāretu sabba janatā bhavagantukattaṃ.
30. Ohāya dibbasarasim khilaloka sabba,
Rammaṅghivāpimavagāhitavāva pāde;
Erāvaṇo karivaro manasābhiriḷhe,
Jantum purindadapuraṃ nayataṃ va sīgham.
31. Hitvā sakambhavanamaṅghinisevanattha,
Māgamma ramma taratāyiha nissito va;
Pāletva mūni padavāpitarāṅgabhaṅgi,
Mangī karontatanuvāsuki nāgarājā.
32. Nāthassa kañcanasikhāvalajātīlīla,

- Māvikaraṃ va padanissitamorarājā;
Taṃ dhammadesanaraveniva luddakassa,
Lokassa pāpaphaṇino hanataṃ asesam.
33. Saṃsārasāgaragate sadhane jane te,
Netampade kalacatumukhahemanāvā;
Nibbāṇapaṭṭanavaram bharukacchakantaṃ,
Suppārapaṇḍita gatā viya āsunāvā.
34. Sambodhi nāṇa paripācayato munissa,
Bhatto yathā himavataddi samādhihetu;
Evammanena bhajataṃ himavaddipāde,
Sambodhiñāṇa paripācanahetu hotu.
35. Daḷhaṃ parājitatayā muninā sarena,
Suññassaropagata pañjara bandhanova;
So pādapañjaragato karavīkapakkhī,
Sabbesamappīyāvacañjahatā bhavantaṃ.
36. Te cakkavāka makarā api koṇca jīvaṃ,
Jīvādi pakkhivisarā sarasīva bhuttaṃ;
Vessantarena caraṇambuji nibbhajantā,
Jantu tahiṃ viya pade suramentu niccaṃ.
37. Taṃ candakinnaragatiṃva gatassa bodhi,
Sattassa tassa sapajāpatikassa bhāvaṃ;
Saṃsūcayanta pada kinnara kinnarī ve,
Sāmaggimagga paṭi pattisu pāpayantu.
38. Saṃrājadhānimusabho vahatagga bhāraṃ,
Pītippayo pajanayeyya savacchadhenu;
Sassevino abhiraṃmentu chakāmasaggā,
Dhārentu jhāyimiha soḷasa dhātudhāmā.
39. Sutvā jinassa karavīka sarammanuññaṃ,
Aññoñña bhītirahitā api paccanīkā;
Hitvā gatiṃ viya ṭhitā padasattarūpā,
Sabbam bhavassita janānagatiṃ hanantu.
40. Sovaṇṇa kāhaḷa yugo pamamindirāya,
Sannīrapuppha mukulopamamussavāya;
Niccaṃ susajja ṭhapitaṃ muni tiṭṭhatante,
Jaṅghadvayaṃ janavilocana maṅgalāya.
41. Lakhyā vilāsa mukuradvaya sannikāsaṃ,
Tāḍaṅka maṇḍana viḍambakamaṃsu saṇḍaṃ;
Jānudvayaṃ laḷita sāgara bubbalābhaṃ,
Hotam jagattaya nijatta vibhūsitunte.
42. Chaddanti dinna varadanta yugopamānā,
Taṃ hatthi soṇḍa kama puṇṇa guṇā tavorū;
Līla payodhi siri keḷi suvaṇṇarambhā,
Khandhāva dentu paripuṇṇa gune janānāṃ.
43. Jaṅghakkha kadvyā samappita cittapāda,

- Cakkadvayī manamanojahayo mune te;
 Sonī ratho sirivaho manasā bhiruḷham,
 Lokattayaṃ sivapuraṃ lahu pāpayātu.
44. Rammora pākaṭa taṭāka taṭā savanta,
 Romāvalī jala panālika koṭikaṭṭhā;
 Nābhī gabhīra sarasī siri keḷitā te,
 Sassevinam vvasana ghammamalam sametu.
45. Kanticchaṭā luḷita rūpa payodhi nābhi,
 Āvaṭṭa vaṭṭita nimujjita sabbaloko;
 Sobhagga toya nivahaṃ visaso pivitvā,
 Lokuttarādi sukha mucchitamaṃ payātu.
46. Gambhīra cittarahadaṃ paripūrayitvā,
 Taṃ sandamāna karuṇambu pavāha tulyā;
 Romālivallihari nābhi subhālavālā,
 Detaṃ lahuṃ sivaphalaṃ bhajataṃ mune te.
47. Cārūra sārīphalako kuṭilagga loma,
 Pantī vibhattī sahito siri keḷi sajjō;
 Saggāpavagga sukha jūtaka keḷi hetu,
 Hotam tiloka sukha jūtaka soṇḍakānaṃ.
48. Gambhīra citta rahado dara gāhamāna,
 Mettādayā kari vadhū kara sanni kāsā;
 Sabbaṅginaṃ sivaphalaṃ tanu deva rukkhe,
 Sākhā sakhā tava bhujā bhajataṃ dadantu.
49. Nihāra bindu sahitaggadalopa sobhi,
 Byālamba ratta padumadvaya bhaṅgi bhājā;
 Pāpārisīsulunatēniva ratta rattā,
 Rattā karā tava bhavumbhuvi maṅgalāya.
50. Rupassirī carita caṅkama vibbhamā te,
 Piṭṭhī yathā kalala muddhani setu bhūta;
 Evaṃ bhavaṇṇava samuttaraṇāya setu,
 Hotammahākanaka saṅkama sannikāsā.
51. Saddhamma desana manohara bherināda,
 Saṃcāraṇe sivapuraṃ visituṃ janānaṃ;
 Givā suvaṇṇamaya cāru mutiṅga bheri,
 Bhāvambhajā bhavatu bhūta vibhūtiyā te.
52. Lakhī nivāsa vadanambuja matta ninna,
 Mākaḍḍhayaṃ jana vilocana caṅcarīke;
 Sorabbha dhamma makaranda nisandamānaṃ,
 Piṇetu tena sarasena sabhā jane te.
53. Lakhī samāruhita vattarathe rathaṅga,
 Dvandānu kāri miga rāja kapola līlam;
 Tādaṅka maṇḍalayugaṃ viya kaṇṇabhājaṃ,
 Gaṇḍatthaladvyamalamkurutaṃ janatte.
54. Lāvaṇṇa maṇṇava pavāḷa latā dvayābham,

Tandeha deva taru pallava kante mantam;
Vattāravinda makaranda parājisobham,
Rattādharadvayamadho kurutam janāgham.

55. Uṇṇā sakuntigata matthaka natthu kūpa,
Subbhū lakāra sahitoṭṭha pavāḷa nāvā;
Gattuttararaṇṇava gatā tava jantukānam,
Hotam bhavaṇṇava samuttaranaya nātha.
56. Isaṃ vikāsa padumodara kesarāli,
Līlā vinaddha rucirā tava danta panti;
Vānī vadhū dharita mālati mālya tulyā,
Tassaṃ jānassa manarañjana mācareyya.
57. Saddhamma nijjhara suratta silātalābhā,
Jivhā vacī naṭa vadhū kala raṅga bhūtā;
Saddhamma seṭṭha taraṇī nihitappiyā te,
Saṃsāra sāgara samuttaraṇāya hotu.
58. Dantaṃsu kañcukīta rattadharo padhāne,
Jivhā suratta sayane mukha mandiraṭṭhe;
Āmokkha mutti vadhuyā sayitāya tuyham,
Kubbantu saṃgama malam jana sotu kāmī.
59. Uṇṇā tathābhinava patta varābhi rāmā,
Līlollasanta bhamukadvaya nīla pattā;
Ghānoru cāru kadalī vadanā lavālā,
Tuyham pavattatu ciraṃ jana maṅgalāya.
60. Bālatthalī hari silātala piṭṭhikaṭṭha,
Bhūvallaridvaya mayūra yugassa tuyham;
Pañcappabhā rucira piccha yugassirīkam,
Nettadvayaṃ manasi puñchatu pāpadhūliṃ.
61. Indīvarāntagata bhīṅgika panti bhaṅgi,
Pañambujassarate viya gacchapantī;
Nettambujassiri tirokaraṇīva tuyham,
Pamhāvalī sirigateha tiro karontu.
62. Vattullasambuja vilocana haṃsa tuṇḍa,
Kañjaṃsu piñjara mulāla latā dvyābham;
Dolādvayaṃva savaṇadvyamatta lakkhyā,
Hotam tavajja janatā maticārahetu.
63. Vammīka matthaka sayānaka bhūridatta,
Bhoginda bhogavali vibbhamamā vahanti;
Ghānopariṭṭhitamune tava tuṇṇamuṇṇā,
Taggāhino viya janassa dadātu vittam.
64. Rūpindirāya vijaye khila loka rūpaṃ,
Ghānoru cāru parighopari baddha siddhā;
Nīlābha vāta viluthanta vayaddhajābhā,
Tiṭṭhantu sajja duritāri jayāya te bhū.
65. Uṇṇassitopala nivesita bunda sandhi,
Ghānoru piṇḍakamaghā tapa rundhitunte;
Hotammukhambuja sirī sirasussitābham,

Bhū nīla paṭṭika lalāta suvaṇṇa chattam.

66. Rupaṅka vedana vilocana bāna diṭṭhī,
Dhārā nisāna maṇivaṭṭa sirī siro te;
Siddhā matosadha katañjana puñja lakkhī,
Hotam janassa nayanāmaya nāsanāya.
67. Sakkhandha bāhuyuga torana majjha gīvā,
Dharappitassirighato pari mussavāya;
Nīluppalāva ṭhapitā savibhatti kante,
Kesā bhavantu bhuvanattaya maṅgalāya.
68. Hemagghiye ṭhapita nīla silā kapāle,
Pajjota jāla lalitam muni sārayantī;
Rūpassirī sirasi bhūsita hema mālā,
Kārā karotu subhagam tava ketu mālā.
69. Bhyāmapabhāli tava kañcana mora kāle,
Surodaye vitata candaka cakkalakkhī;
Meghāvanaddha sikharunnata hema selā,
Yantindacāpa vikatīva dadātu sobham.
70. Paṭṭhāya te paṇidhito suci dāna sīla,
Nekkhamma pañña viriyakkhama saccadhiṭṭhā;
Mettā upekkhiti ime dasa pūratova,
Pūrentu pārami guṇā janatānamatte.
71. Pattuttaruttaradasā paṇidhāna bījā,
Cetoradharāya karuṇā jala sekha vuddhā;
Sabbaññañña phaladā sati vāṭa guttā,
Tam samphalandisatu pāramitā latā te.
72. Ābodhi puṇṇami paḍiṭṭha dinādito te,
Sambhāra kāla sita pakkha kamābhi vuddho;
Sampuṇṇa pārami guṇāmataramsi tamva,
Sabbāṅgi kunda kumudāni pabodhayeyya.
73. Āpacchimabbhava sivapphala lābha dānā,
Dānappabandhamapidāna phalappabhandam;
Samvaḍḍhayi tvam abhipatthanato yathevam,
Jantuttaruttara phalam khalu sambhunantu.
74. Ārambhatoppabhuti yāva tavaggamaggā,
Vikkhālita ghakalusam suci sīla toyam;
Mettā dayā madhura sīlatāyupetam,
Sodhetu tvamva bhava nissita jantu metam.
75. Āpaccimattamabhinikkhamanābhiyogā,
Paṭṭhāya tampabhavato paripuṇṇa gehā;
Tvam sabba jāti gahato api nikkhamittho,
Evam janā bhava dukhā khalu nikkhamantu.
76. Ekaggato pala tale nisitā cirandhi,
Dhārā sucittu sutale sati daṇḍa baddhe;
Nibbijji lakkhaṇa dhanuṭṭhiti santi lakkham,

Khittā tayonamanu vijjhatu jantu khittā.

77. Tvaṃ pāramī jala nidhiṃ caturīha bāhu,
Sattīhi suttari ciraṃ janakova sindhuṃ;
Sampanna vikkama phalosi yathā casova,
Evaṃ janā viriyatapphalame dhayantu.
78. Satta paradha dahanesu ciraṃ sudhantaṃ,
Khantī suvaṇṇa kata rūpa samantimattā;
Sabbā parādhamasahi tvaṃasayhamevaṃ,
Sabbe janāpi khamanena bhajantu santiṃ.
79. Lakkhādhikaṃ catura saṃkhiya kappa kālaṃ,
Saccena suṭṭhu paribhāvita vācino te;
Vācāya sacca phusitāya samenti jantu,
Evaṃ visuddha vacanā janatā bhavantu.
- 80.
- Ādinna dhamma mahiyatthira suppatiṭṭhā,
Dhiṭṭhāna pārami mahā vajiraddi tuyhaṃ;
Sattena kena pi yathāhi abhejja nejjo,
Evaṃ janāpi kusalesu adhiṭṭha hantu.
81. Tvaṃ sabba satta cirabhāvita metta citta,
Toyehi saṃsamita kodha mahā hutāso;
Lokuttaraṃ taditaraṃ hitamāvahittho,
Evaṃ janesu janatā hitamāvahantū.
82. Mittopakāra paṭipakkha janāpakāre,
Tvaṃ nibbikāra manaso cirabhāvanāya;
Pattosilābha pabhutaṭṭusu nibbikāraṃ,
Evaṃ janānunaya kopa nudā bhavantu.
83. Sampanna hetu vibhavo tusite vimānaṃ,
Yuttaṃ guṇehi navabhippadavī vimānaṃ;
Tvaṃ vādhiparamidhirohiniyā tiloko,
Ārohatu bhaya sukhaṃ padavī vimānaṃ.
84. Tvaṃveraḥaṃsi samabujjhi yathāca sammā,
Sampanna vijja caraṇo sugatosi hontu;
Lokaṃ vido purisadammasusārathī si,
Satthāsi bujjhi bhagavā si tatheva jantu.
85. Saccitta bhū nidahitaṃ janatāya tuyhaṃ,
Kalyāṇavaṇṇaratanaṇṇavajātibhinnaṃ;
Dukkhaṃ cora jalupaddutajāti gehe,
Tassā sukhaṃ bhavatu jīvitumāpadāya.
86. Vācā vicitta vara tantu gataṅgi kaṇṭhe,
Svā mutta sagguṇa mahā ratanā valī te;
Vevaṇṇi yattani bhavaṃ sakalampahāya,
Hotaṅjanassa siri saṅgama maṅgalāya.
87. Taṃ sagguṇatthava dahaṭṭha sutippanāli,

- Nissandamāna guṇanīra nipāna tinte;
Khetsetta saññini janā kata loma haṃsa,
Bjankurī kusala sassa phalaṃ labhantu.
88. Āpāyikappabhuti dukkha nidāgha kāla,
Santāpitā nikhila loka mano kadambā;
Taṃ vaṇṇa megga phusanā hasanaṅkurehi,
Iddhā bhavantu mati vallari vellitā te.
89. Hetuddasā phaladasā samavaṭṭhitaṃ taṃ,
Sabbattha satta hitamāvahaṇena siddhaṃ;
Cintāpathātiganubhāva vibhāvanante,
Bhūtānamatthu caritabbhutamattha sidhyā.
90. Aṅgārakāsumabhilaṅghiya dāna kāle,
Bhattattano pada paṭicchaka paṅkajā ca;
Yātakkaṇe tava pade dhaṭamuṭṭhahitvā,
Paṅkeruhāṃ siva madhuṃ sarataṃ dadantu.
91. Saccena maccha pati vassita vassadhārā,
Satte dayāya tava vassita vassadhārā;
Gimhe janassa samayimsu yathā tathātā,
Dhamambuvuṭṭhiva samentu kilesa dāhe.
92. Chaddanta nāga patinā khamatā parādhaṃ,
Chetvā kare ṭhapita dantavarāva luddhaṃ;
Loke hitāya ṭhapitā tava danta dhātu,
Seṭṭhā janaṃ siva purāṃ lahu pāpayantu.
93. Taṃ temiyākhyā yatinossama mālakamhi,
Okīṇṇa mutta kanakā vuja vippakiṇṇā;
Kāruṇṇa vārida cuto daka bindu bandhū,
Dhātu samentu tava jantusu dukkhadāhe.
94. Raṭṭhassa attha caraṇāya asammukhassa,
Rāmena dinna tiṇa saṃkhata pādukāva;
Bhuttā tayā ciramasammukha nāgatassa,
Lokassa atthamanu tiṭṭhatu patta dhātu.
95. Vutto janānamupadissa varāha rañṇā,
Satthiṃ sahassa saradaṃ viya ñāya dhammo;
Ādeyya heyyamupadissa tayā pavutto,
Dhammo pavattatu ciraṃ janatā hitāya.
96. Mārāri maddana hitādhigamaṃ karotā,
Bhatto tayā vara mahā jaya bodhi rājā;
Saggā pavavagga hitahetu janassa hantvā,
Sabbantarāyamiha tiṭṭhatu suṭṭhu sajjō.
97. Sāmoda vaṇṇa bhajanī guṇa mañjarīyaṃ,
Cariyā latā vikasitā tava sapphalaṅgaṃ;
Okīṇṇa citta madhupe rasa pīṇayanti,
Sambhāvitā bhuvi pavattatu matthakehi.
98. Sambuddha selavalayantara jānanavhā,

Nottattato tipathagā yati sāgaratṭhā;
Dhammā pagā suti vase tarite puṇanti,
Sambhāra sassamiha vattatu pacayanti.

99. Paññāṇa kūpa sita paggaha vāyu gāhī,
Saddhā lakāra sahitā sati pota vāhā;
Sampāpayātu bhava sāgara pāra tīra,
Sappattanaṃ varadhane pati patti nāvā.
100. Bojjhaṅga satta ratanākara dhamma khandha,
Gambhīra nīra caya sāsana sāgaro saṃ;
So sīlyananta tanu veṭṭitha ñāṇa mantha,
Selena manthitavataṃ disatā mataṃ ve.
101. Vuttena tena vidhinā vidhinā tato taṃ,
Laddhā nubhūtamamataṃ khila dosa nāsaṃ;
Accanta roga jaratā maraṇā bhi bhūtaṃ,
Bhūtaṃ karotu amaraṃ ajaraṃ arogaṃ.
102. Saddhamma rāja raviniggata dhammamaṃsi,
Phullo dhutaṅgadala saṃvara kesarāli;
Saṅghāravinda nikaro samadhuṃ samādhi,
Sakkiṇṇiko disatu sāsana vāpi jato.
103. Ānanda rañña ratanādi mahā yatinda,
Niccappabuddha padumappiya sevinaṅgī;
Buddhappiyena ghana buddha guṇappiyena,
Therālinā racita pajjamadhuṃ pibantu.
104. Itthaṃ rūpa guṇānukittanavasā taṃ taṃ hitā siṃ sato,
Vatthānussati vattita iha yathā sattesu mettā ca me;
Evaṃ tābhi bhavanta ruttara tarā vattantu tā bodhi me,
Saṃyogoca dhanehi santihi bhava kalyāna mittehi ca.